

երբեմն նա ասում էր՝ թե որքան լաց կը լիներ, եթե ինձ չգտներ, թե նա բոլոր գիշերը կը պտռեր ինձ, մի՛շտ կը պտռեր: Յայտնում էր՝ թե իմ պառկած տեղը շատ վատ տեղ է, եւ նա ուրախ է, որ վտանգ չէ պատահել ինձ. ասում էր՝ թե այն ձորը կոչւում է Ղանլի-Դարայ (Արիւնտ ձոր), որովհետեւ քիչ չէ պատահում, այնտեղ գտնում են սպանած մարդերի դիակներ: Բացի դրանից, ակելացնում էր նա, այնտեղ գազանները շատ անգամ պատառոտում են մարդկանց, երբ նրանք պաշտպանուելու զենք չունենին իրանց հետ: Յանդիմանում էր իմ անհոգութիւնը, թե ինչո՞ւ ես զենք չէի կրում, թե գոնեայ պետք էր ունենալ իր մօտ մի ջուխտ ատրճանակ եւ խենջար:

– Ապա դու ինչպե՞ս առանց զենքի չվախեցար այն ձորը մըտնել, – հարցրի ես:

– Միթէ գիշերն առանց զենքի մա՞ն են դալիս, – պատասխանեց նա ծիծաղելով իմ պարզամտութեան վրայ, եւ ցոյց տոեց մի ջուխտ ատրճանակներ, որ թաքցրած ուներ իր գօտիի մէջ:

Եթէ ցերեկ լիներ, Մարօն կը նկատեր, թէ որպե՛ս կարմրեցայ ես ամօթից...

#### ԻԳ. ՆԵՐՔԻՆ ԿՈՒԻ

Հասնելով ծերունի որսորդի տունը, մենք գտանք բոլորին քնած: Մըհեն, որ բաց արեց դուռը, յայտնեց՝ թէ իր աղան տանը չէր եւ ոչ նրա հիւրերը դարձել էին իրանց «գնացած տեղից»: Ես մտածեցի, անպատճառ մէկ արգելք պետք է պատահած լինի, որովհետեւ Կարօն եւ նրա ընկերները խոստացան, թէ մինչեւ երեկոյ կը վերադառնան: Յասոն իր ազարակումն էր: Նա տան երես չէր տեսնում, քանի իր մշակութեան գործերը վերջացած չէին դաշտերից. ձմեռոյ ձիւները միայն մի քանի ամիս նրան քշում էին դեպի տուն:

Մարօի առաջին հոգսը եղաւ պատրաստել ինձ համար մի բան ուտելու: Ընթրիքից յետոյ նա զցեց իմ քնելու շորերը, եւ ցանկանալով ինձ բարի գիշեր, ինքն եւս գնաց հանգստանալու:

Առաւօտեան ես զարթեցայ խիստ ուշ. երկար քունը բաւականին կազդուրել էր իմ առողջութիւնը. ես զգում էի ինձ զոարթ եւ ևորոգած ուժերով: Սիրտս էլ սովորականից ակելի ուրախ եւ հանգիստ էր, որպէս թէ, ես գտնուում էի մի անսահման բաւականութեան մէջ, լոյս աշխարհում ոչինչ պակաս չէր մնացել ինձ, բոլորը՛, բոլորը՛, լրացրել էր այն արարածը, որին սիրում էի ես, որը սիրում էր ինձ: